



Senin, 12 September 2022
Ogen: 1 Samuel 2:26



Erngenanana Ate Tuhan Ras Manusia



Sekalak ndehara ertoto alu meseksek man Dibata. Nina bas totona "O Tuhan si Mada Kuasa, perdiatoken min aku suruh-suruhanNdu enda! Nehenlah kesusahenku janah ingetlah aku! Ola lupaken aku! Adi iberekenNdu man bangku sekalak anak dilaki, erpadan aku maka kuendesken ia man baNdu kidekah geluhna,..." Ia sekalak ndehara si enggo ndekah erjabu tapi lalap langa lit pupusna piahna peasi-asi entah isaling-saling kiduana erkiteken la lit pupusna.

Tuhan megiken pertoton Hanna, iberekenNa ia mupus anak dilaki janah ibahan me gelarna Samuel sabap nina " man Tuhan ku pindo ia." Meriah ukur ngaloken pemere Dibata e, e maka idalankenna me kai si enggo ipadankenna ndube man Dibata. Iendeskenna anak e ku rumah pertoton sabap sekerajangen Tuhan kap ia. Bage me Samuel nggeluh i bas rumah pertoton ras imam Eli, janah tiap tahun nandena Hanna nehken persembahen dengen mereken baju si ibahanna guna paken Samuel. Samuel pe reh belinna janah erngenana ate Tuhan ras manusia man bana. Melem kel ate, dengen sangap kel orang tua adi anakna malang man Dibata. Kegeluhen Samuel selaku anak PERMATA ncidahken kegeluhen situhu-tuhu maba kemalemen ate. Ia ngeluh bas rumah pertoton, erdalan bas dalam Tuhan, patuh dengen setia man Tuhan. La terpengaruh nandangi perbahanen teman sekelewetna bagi anak imam Eli. Kai si ibahan Samuel e ngena ate manusia. Enda me nilai si kuh (serta) sierbahanca malem tuhu-tuhu ate keluarga kerina. Siakuilah si e kerina la terlepas bas ngaruh nande tetap setia notoken ia dengen tetap ermediate man anak-anakna. Aminna pe pedauh-dauh ras anak tapi tetap iperdiatoken, ibahan jadwal ercakup ras anak. Pengarapen ras totonta man anak PERMATA bas ulang tahun pe-74 enda, ngeluh i bas rumah pertoton ras erguna ku sekelewet.